

Kontuola

ANTZUOLA / Egubakoitza / 2004eko martxoaren 5a / 192. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

'Ugaztun baten antsiak' antzezlanana etzi, domeka


AINZANE IRIZAR

Teresa Lopez de Munain aktoreak *Ugaztun baten antsiak* antzezlanana eskainiko digu etzi, domeka. Herri lkastetxeko aretoan izango da emanaldia, 19:00etan. Bakarriketa baten bitartez, gaur egun pil-pilean dauden hainbat gai taularatuko ditu.

Telebistan ezagutu genuen gehienok Teresa Lopez de Munain aktorea. Batez ere, *Goenkale* telesailan egin zen ezaguna: *Gina* italiarraren papera egiten zuen hantxe. Hala ere, aspalditik dihardu antzerkiaren eta antzezpenaren esparruan, eta hainbat antzezlanean parte hartutakoa da. Txorropio, Pantxi eta Pantxo *klown* taldeko kide ere bada.

PIL-PILEAN DAUDEN GAIK

Emakume batek bere haurtzararen gainean dauzkan oroitzen, bizipen eta sentimenduen gainean berba egiten du antzezlana horretan. Bakarriketa da, eta Teresa Lopez de Munain aktorea bere amaren, irakasleen, auzokoen eta aitaren paperean sartzen da, besteak beste. Inguruko jende helduaren ikuspuntuak, ohiturak, gaitasunak, pentsatzeko



BLAIKOM

Teresa Lopez de Munain aktorearen bakarriketa da antzezlanana.

erak, eta abar taularatzen ditu, neska txiki baten ikuspuntutik.

Umeen heziketarekin lotutako gaiak ere lantzen ditu, eta horren inguruko eztabaidak jartzen ditu mahai gainean; hala nola, umeari bularra ematearen

garrantzia, umeen ametsak, amaren eta umearen arteko harremana, umeen heziketaren gaineko kontuak... Gogora ezazue hori guztia eta gehiago ikusi ahal izango dugula eskolako aretoan, domekan, 19:00etan.

ANELKAR

Emakumeari buruzko erakusketa Oларanen

AINZANE IRIZAR

Anelkar Antzuolako Elkartasun Taldeak antolatuta, Amnesty International erakundearen argazki erakusketa zabalduko dute oraingo asteburuan, Oларan etxeko aretoan. *Giza eskubideak, emakumeen eskubidea* du izena argazki erakusketa horrek, eta emakumea du oinarri. Datorren asteko asteburuan ere ikusgai egongo da.

Honakoa izango da ordutegia: 12:00etatik 14:00etara eta 18:30etik 20:00etara.

EMAKUMEAK ARGAZKITAN

Guztira, hogeitaz argazki jarriko dituzte ikusgai. Erakusketa helburua da emakumeek munduan bizi duten egoera ezagutzera ematea. Besteak beste, honako izenburuak daramatzaten argazkiak egongo dira: *Emakumeak torturatuak, Emakume ekintzaileak eta Gehiegikeriak erlijioaren izenean.*

Bestalde, gai horrekin lotutako hitzaldia ere egingo dute; zurrerik, hilaren 11n, eguena, izango da hitzaldia, baina, baitezkezteke dute oraindik.



Afganistango emakume talde bat, manifestazio baten.

HAUTESKUNDEAK

Aralar-Zutik koalizioa aurkeztu zuten herrian eguazten iluntzean

Eguazten iluntzean, udaletxeko osoko bilkuren aretoan egin zuen Aralar-Zutik koalizioak aurkezpena. Pilar Etxaniz Kongresurako zerrendako hautagai antzularrak eta Ainhoa Larrañagak egin zuten berba.

EZKERREKO KOALIZIO BERRIA

Koalizioak ezkerrek duen garrantzia nabarmendu zuen Antzuolan. Leloak ere horixe adierazten du "Euskal Herria ezkerretik" erai-

kitzeko nahia. Adierazi zuten, gizarteko ezkerreko eragileen bilgune izateko aurkezten dira hauteskunde hauetara. Ezker berri, ireki, anitz eta eraldatzaile baten ernamuina direla adierazi zuten. Ezker nabarmen zeaz gain, esparru politiko berri bat ireki beharraz jardun zuen Ainhoa Larrañaga Aralar koalizioaren zuzendari-tzako kideak.

Aralar-Zutik koalizioa zergatik osatu zuten ere azaldu zuten:

"Euskal Herri burujabe baten alde apustu egiteko, bere etorkizuna askatasunez eta demokratikoki erabaki dezan". Pilar Etxaniz Zutik-eko ordezkariak emakumearen eta politikaren gaineko hausnarketa egin zuen, eta adierazi zuen "emakumeek garrantzi handia dutela politikan". Argi dute Euskal Herriari dagozkion gai askoz egiten dela berba Madril, eta han egon behar dela ezkerreko den aukera bat.



Pilar Etxanizek eta Ainhoa Larrañagak parte hartu zuten aurkezpen ekitaldian.

ELKARRIZKETA

INES MENDEZ/ABOKATUA ETA NEKAZARITZA EKOLOGIKOAREN IKASLEA

“Nekazaritza ekologikoa gertutik ezagutzera etorri nintzen Lapatzara”

A.I.

Ez da oso ohikoa abokatu bat baratzean ikustea. Bada, horrelaxe ibili da Ines Mendez. Nekazaritza ekologikoaren gaineko ikastaro bat egin eta Lapatzara etorri zen gehiago ikastera; hantxe egon da aurreko astera arte.

Zelan abokatu donostiar bat Lapatzara baserrian?

Fraisoro nekazaritza eskolan nekazaritza ekologikoaren gaineko ikastaroa egin nuen; bost hilabeteko ikastaroa izan zen, eta hori bukatu nuenean, Diputazioaren beka bat lortu nuen, praktikak egiteko. Horrelaxe, beka hari esker etorri nintzen Lapatzara, eta sei hilabete egin ditut hemen.

Zelan piztu zitzaizun nekazaritza ekologikoarekiko jakinmina?

Orain arte enpresa esparruarekin lotuta egin dut lan, abokatu. Baina nekazaritza ekologikoarekiko interesa nuen, eta arlo horretan lan egin nahi nuen. Horregatik egin nuen Fraisoro ikastaroa. Izan ere, horretan lan egiteko mundu hori hobeto ezagutu nahi nuen, bertatik bertara.

Baratzean lanean ikasi duzu, hortaz, zer den nekazaritza.

Bai; eta horrekin batera, Ekonekazaritzarekin, Euskal Herriko nekazaritza ekologikoaren federazioarekin, proiektu bat egin ere ibili naiz. Nekazaritza ekologikoan badago sistema bat zertifikatzen duena produktu bat ekologikoa dela. Euskal Herrian Eusko Jaurlaritzak egiten du hori, baina kontseilu bat sortu nahi dute zeregin horretarako. Nekazaritza ekologikoaren sektoreak proposamen bat aurkeztu dio Jaurlaritzari, eta horretan lanean ibili naiz.

Ezagutzen zenituen Antzuola eta inguruak?

Bada, ez; gainera, barrualdeko askotan esaten duzue hiri-



A.I.

“Abokatu naiz, eta orain arte enpresa esparruan egin dut lan; aldatu egin nahi nuen”

burukook ez ditugula zuen herriak ezagutzen, eta nire kasuan, behintzat, halaxe zen; horrela, aukera izan dut Antzuola eta inguruko herriak ezagutzeko. Egia esan, ez naiz Antzuolako bizimoduan askorik murgildu, baina gustatu zait.

“Antzuola eta inguruak ezagutzeko aukera izan dut; barrualdeko herriak ez nituen ezagutzen”

Hemen sei hilabete pasatuta, herriarekin harremanetan jarraituko duzu, ezta?

Bai; gainera, Lapatzan egon naiz bizi izaten, eta harreman estua egin dut familia osoarekin. Gaur bertan ere hantxe egon naiz bazkaltzen.

LABUR

Goi-tentsioko kableak jausi zirelako egon ziren antzuolar gehienak argindar barik

Zapatuan, 20:00ak aldera geratu zen Antzuola ia guztia argindar barik, eta halaxe egon ziren domeka gauerdia arte. Argindar mozketaren arrazoia izan zen goi-tentsioko kable batzuk jausi egin zirela, elurraren pisuagatik. Kable horiek zeuden tokira iristeko hainbat arazo izan ei zituzten Iberdrolako langileek, eta horregatik atzeratu zen konponketa. Astelehen goizean, berriro ere geratu zen herria argindar barik; kasu horretan, hiru orduko etenaldia izan zen. Bestalde, aipatzekoa da martitzen goizean izotzak hainbat arazo eragin zituela herrian.

Erretiratuak Peñiscolara joango dira, Arrasateko Abaroa elkartearekin batera

Arrasateko Abaroa elkarteak elkarrekin bidaia bat egitera gonbidatu ditu Antzuolako erretiratuak. Peñiscolara egingo dute bidaia, maiatzaren 6tik 15era. Bihar, zapatua, izango duzue izena emateko aukera erretiratuen elkartearekin. 270 euro ordaindu beharko dira.

Martxoaren 10ean, berriz, Legazpira irteera egingo dute; Mirandaola, Artzaintzaren Ekomuseoa eta Ogiaren Txokoa bisitatuko dituzte. Gaur, egubakoitza, eta bihar, zapatua, 18:30etik 19:30era eman dezakezue izena. Domekan, berriz, 17:00etatik 18:00etara.

Pello Zabalaren hitzaldia martxoaren 9ra, martitzena, atzeratu behar izan dute

Aurreko asteko eguenean, hilak 26, egitekoa zuen berbaldia Pello Zabalak Antzuolan, erretiratuen elkartearekin antolatuta; eguraldiak sortutako arazoengatik, baina, bertan behera laga behar izan zuten.

Datorren martitzenean, martxoak 9, izango da atzeratutako hitzaldia, Olanan etxean, 18:00etan. *Klimatologia eta tenporak* izenburua darama saioak, eta nahi izanez gero, Pellori galderak egiteko eta berarekin solasaldia egiteko aukera izango da.

Independentzia Eguna martxoaren 27rako antolatuko dute Gazte Asanbladako kideek

Jarri dute aurtengo Independentzia Egunerako eguna: martxoaren 27an, zapatua, ospatuko dute egun hori. Dagoeneko salgai jarri dituzte bazkarirako txartelak, Mox eta Larrea tabernetan, 15 euroren truke. Bestalde, martxoaren 27rako aurrez ikusita zuten sagardotegirako irteera, bertan behera laga dute; izan ere, jende gutxi eman du izena. Berriro egin dute deialdia, apirilaren 3rako. Etzi, domeka, izango da izena emateko azkeneko eguna.

KIROLA

PARTIDUAK

FUTBOLA

Martxoak 6

16:00: Antzuola-Intxaurdi (Neskak)

Oharra: Kadete mailako futbol taldeak

oraingo asteburuan, Estalan,

Ikasberriaren aurka jokatu beharreko

partidua bertan behera laga dute.

EMAITZAK

FUTBOLA

Elurteagatik, bertan behera geratu ziren aurreko asteburuan herriko taldeek jokatu beharreko partiduko guztiak.

PILOTA

Udaberri Saria

Olalde-Altzatarrak (paletaz) . . . 26-35

Elgeta-Olalde (eskuz kadet.) . . . 5-22

LARREA

TABERNA

Kalebarren 17
ANTZUOLA

ANTZUOLA

Apainketak eta
isolamenduak
Pladurrezko dibisioak

Kalegoi 21 ANTZUOLA
676 997 400
Biltegia: 943 78 70 40

Tomas Gezalaga

**Zoruen kutxilatua
eta
bernizatzea**

Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

GAILUR

taberna eta
gozotegia

Buztinzuri 13 ANTZUOLA
Tel.: 943 78 70 32

Tomas Gezalaga

**Apainketarako eta
industriarako pinturak**

Paper murgotzak

Moketak eta tapizatuak

Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA